

四庫全書

史部

欽定四庫全書

史部

關中勝蹟圖志卷五

六

詳校官太僕寺少卿_臣李廷欽

編修_臣程嘉謨覆勘

總校官進士_臣朱鈐

校對官助教_臣胡予襄

謄錄監生_臣韓鉉

欽定四庫全書

關中勝蹟圖志卷五

陝西巡撫臣畢沅撰

古蹟宮闕

唐京城唐書地理志上都初曰京城天寶元年曰西京
至德二載曰中京上元二年復曰西京肅宗元年曰上
都京城前直子午谷後枕龍首山左臨灞岸右抵澧水
德宗本紀貞元四年築夾城長安志唐京城東西一十

八里一百一十五步南北一十五里一百七十五步周
六十七里郭中南北十四街東西十一街其間列置諸
坊有京兆府萬年長安二縣當皇城南朱雀門有南北
大街曰朱雀門街東西廣百步萬年長安二縣以此街
為界萬年領街東五十四坊及東市長安領街西五十
四坊及西市天祿識餘咸陽有六岡如乾之六爻唐時
宮殿皆在九二岡上而作太清宮於九五岡上百官府
在九四岡上明德門六典南面三門中曰明德長安

志北當皇城朱雀門南出抵終南山八十里 啟夏門
六典南面三門中曰啟夏長安志門外西南二里有圓
丘先農籍田三壇按長安圖東南角有進芳門 安化
門六典南面三門西曰安化 通化門長安志東面三
門北曰通化門至德三載改為達禮門尋復舊 春明
門六典東面三門中曰春明實錄開元十七年五月侍
臣以下燕於春明門 延興門六典東面三門南曰延
興 開遠門長安志西面三門北曰開遠門 金光門

六典西面三門中曰金光唐書韓朝宗傳韓朝宗天寶初為京兆尹分渭水入金光門長安志西出趨昆明池也
延平門六典北面一門曰光化門

已上京城

皇城六典在京城之中其中左宗廟

在安上門內之東

右社稷

在含光門之東

百寮廨宇列乎其間凡省六寺九臺一監四衛

十有八東宮官屬凡府一坊一寺三率府十 朱雀門

長安志皇城南面三門中曰朱雀門北當宮城之承天門南當外郭之明德門玉海隋志士庶不得雜居朱雀

門之內故宗廟官寺兵衛悉在焉 安上門長安志朱

雀門東曰安上門至德三載改為光天門尋復舊 舍

光門長安志朱雀門西曰含光門 定武門安禮門元

德門長安志北面三門正北曰定武門次東曰安禮門

又東曰元德門即西內東宮北門也

已上皇城

西內太極宮唐書地理志宮城在皇城之北長千四百四十步廣九百六十步周四千八百六十步其崇三丈有半長安志宮城東西四里南北二里二百七十步周

十三里一百八十步南即皇城北抵苑東即東宮西有掖庭宮玉海龍朔後皇帝常居大明宮乃謂之西內神龍元年改曰太極宮雍錄太極宮者隋大興宮也諸帝多居大明宮或遇大禮大事復在太極如高宗元宗每五日一御太極有初即位不於大明而於太極者知太極尊於大明也雍勝畧按西內有三城外一重曰京城外郭城也中一重曰皇城惟列府市不使雜人居止又內一重是曰宮城則今之省城正直宮城之地所謂六

父九二之地也 承天門長安志正殿南承天門隋開

皇三年作初名曰廣陽門仁壽元年改曰昭陽門唐武

德元年改曰順天門神龍元年改為承天門外有朝堂

東有睥石西有登聞鼓 長樂門重福門

一曰重門

永春門

六典注承天門之東曰長樂門長安志次東門曰重福

門即東宮之正門次東曰永春門東北為延喜門 廣

運門永安門長安志承天門之西曰廣運門內有左右

藏庫次西曰永安門 通明門嘉猷門長安志西面二

門南曰通明門北曰嘉猷門 嘉德門長安志太極門
外承天門之內曰嘉德門 歸仁門納義門長安志嘉
德門東廊有歸仁門西廊有納義門 太極門長安志
當承天門內北曰太極門隋曰大興門後改曰乾福門
貞觀八年改為太極門東隅有鼓樓西隅有鐘樓貞觀
四年置 太極殿唐書高祖本紀武德元年五月甲子
即皇帝位於太極殿六典太極門內曰太極殿朔望則
坐而視朝焉注蓋古之中朝也隋曰大興殿武德元年

改有東西上二閣門通志東上閣在太極之東西上閣
在太極之西 左延明門右延明門長安志在太極殿
東廊有左延明門西廊有右延明門 門下省在左延
明門東南中書省在右延明門東南玉海時謂尚書省
為南省門下中書省為北省亦謂門下省為左省中書
省為右省或通謂之兩省 宏文館兩京記在門下省
東唐書百官志武德四年置修文館於門下省九年改
曰宏文館神龍元年改曰昭文館 史館長安志在門

下省北貞觀三年置秘書內省以修五代史又置史館以編國史尋廢秘書內省 朱明門六典太極殿北曰朱明門左曰乾化門右曰肅章門長安志肅章門西曰暉政門乾化門東曰武德門 武德殿延恩殿六典武德門內有武德殿延恩殿 兩儀門六典朱明門北曰兩儀門 兩儀殿六典兩儀門內曰兩儀殿常日聽朝而視事焉注蓋古之內朝也長安志兩儀殿在太極殿後隋曰中華殿唐貞觀五年改 萬春殿六典兩儀殿

之東又千秋殿兩儀殿之西又新殿長安志兩儀殿東
有新殿 獻春門六典兩儀之左又宜秋門兩儀之右
宜秋之右曰百福門 百福殿長安志百福門內曰百
福殿宣宗改雍和宮內有親親樓諸王宴會之所也會
要大中元年勅修百福殿八十間 承慶門六典百福
之西曰承慶門 承慶殿六典承慶門內曰承慶殿
立政門六典獻春之左曰立政門 立政殿六典立政
門內 大吉門六典立政之東 大吉殿六典大吉門

內 甘露門六典兩儀殿之北曰甘露門長安志門外
有東西永巷東出橫門又東有日華門西出橫門又西
有月華門院北有東西千步廊西有掖庭 甘露殿長

安志甘露門內會要太和二年修兩儀殿及甘露殿一

百七十二間

唐李嶠甘露殿侍宴應制詩月宇臨丹地
雲牕網碧紗御筵陳桂醕天酒酌榴花水

向浮橋直城連禁苑斜承
恩恣歡賞歸路滿烟霞

神龍門長安志甘露門左

神龍殿長安志神龍門內武德殿後 安仁門長安志

甘露右 安仁殿長安志安仁門內甘露殿西 佛光

殿長安志神龍殿西 歸真觀長安志安仁殿後觀後

有綵綵院西有咸池殿 淑景殿長安志歸真觀西殿

西有第三落次西第四落又次西第五落 延嘉殿長

安志在甘露殿北殿南有金水河往北流入苑 承香

殿長安志延嘉北有承香殿通志西有昭慶殿殿西為

凝香閣閣西為鶴羽殿 景福臺通志延嘉殿西北長

安志臺西有望雲亭 紫雲閣通志神龍殿東長安志

閣西有南北千步廊舍南至尚食院西北盡宮城閣南

有山水池尚食內院 凝陰殿通志紫雲閣西 凌烟

閣長安志凝陰殿南南部新書凌烟閣畫功臣皆北向

長安志凌烟閣西有功臣閣東有司寶庫 毬場亭子

一作鞠場亭子

長安志凝陰之北有毬場亭子 宏文殿觀雲

殿通志俱在凝陰殿北 四海池雍大記一在毬場亭

之東一在咸池殿之東一在望雲亭之西一在望雲亭

之北 掖庭長安志永安門西有掖庭 內侍省長安

志掖庭南隅有內侍省 興仁門宣猷門崇道門惠訓

門昭德門安禮門正禮門宣光門通福門光昭門嘉猷
門華光門暉儀門壽安門綏福門翔鳳殿薰風殿就日
殿臨照殿望仙殿鶴仙殿乘龍殿翔鳳閣

並見六典方
位無攷已上

西內太
極宮

東宮門即東宮正門也門外有東宮朝堂在焉 宣明
門長安志嘉德正南 嘉德門長安志明德殿南門東
有東奉化門西有西奉化門門外東廊為左永福門西
廊為右永福門 明德殿長安志東宮正殿會要武德

九年八月太宗即位於東宮明德殿玉海即顯德殿中
宗諱顯為太子時改曰明德長安志殿東廊為左嘉善
門西廊為右嘉善門 宜春宮宜秋宮長安志俱在明
德殿旁 宜春門通志宜春宮外門外有典膳厨宜春
北苑又宜秋門在宜秋宮外門外道東有命婦院 左
春坊通典龍朔二年改門下坊為左春坊玉海東宮宜
春宮門外有左春坊坊南有崇文館 右春坊通典龍
朔二年改典書坊為右春坊玉海東宮宜秋宮門外有

右春坊 崇教殿在明德殿後又麗正殿集賢注記在
崇教殿之北光大殿之南長安志開元改為集仙殿十
三年改為集賢殿佛堂院通志在麗正殿後東為射殿
承恩殿崇文殿崇仁殿八風殿射殿亭子山池左右
長林門

掖庭宮長安志宮城東西四里南即皇城北抵苑掖庭
西門貞觀二年敕左丞戴胄於掖庭西門簡宮人出之
按掖庭宮蓋高祖所起宮人教藝之所也

大安宮雍錄在宮城外西偏太宗嘗獵昆明池獻獲於
大安宮蓋自昆明東歸之路也唐書地理志長安縣有
大安宮本宏義宮會要武德七年五月營宏義宮初秦
王居宮中承乾殿高祖以秦王有克定天下之功建宏
義宮以居之至九年七月高祖以宏義宮有山林勝境
雅好之貞觀三年四月乃徙居之改為大安宮 垂拱
前殿通志在大安宮 戢武殿長安志在大安宮實錄
太宗與公卿謁太上皇於戢武殿置酒為歡乙夜方散

又文思殿長安志在大安宮 翠華殿通志在大安宮

東北遺址尚存俗云祭酒臺

已上大
安宮

東內大明宮雍勝畧在省城東北今含光殿故基高四十餘尺去城三里殿基前有翔鳳閣栖鳳閣二基猶存唐書地理志上都大明宮在禁苑東南接京城之北面西接宮城之東北隅長千八百步廣千八十步長安志初高宗命司農少卿梁孝仁制造此宮北據高原南望夾塏每天晴日朗望終南山如指掌京城坊市街陌俯

視如在檻內雍錄大明宮本太極宮之後苑東北面射殿也地在龍首山上太宗初於其地營永安宮以備太上皇清暑九年正月雖嘗改名大明宮然太上皇仍居大安不曾徙入也龍朔二年高宗染風痺惡太極宮卑下故就修大明宮改名蓬萊取殿後蓬萊池為名也長安五年又改為大明宮長安志叙載其地比太極宮承天門則退北三坊地而中析之以為六坊中六坊地以為丹鳳中門正街可達承天南即朱雀正街矣其百司

庶府居民第宅仍依大興都城之舊無所更易故東內
大明雖曰創營而朝市悉仍隋舊無所增移也 丹鳳
門六典南面五門正南曰丹鳳門長安志至德三年改
為明鳳門尋復舊名 望仙門延政門六典丹鳳門東
曰望仙門次曰延政門長安志望仙門貞元中修有樓
十間延政門抵長樂坊北 建福門興安門六典丹鳳
門西曰建福門次曰興安門會要故事建福望仙等門
昏而閉五更而啟至德中勅晚開元和二年令有司各

據班品置待漏院於建福門外長安志望仙建福二門
內各有下馬橋跨東西龍首渠 太和門日營門長安
志太和東面一門日營西面一門 元武門銀漢門青
霄門長安志北門曰元武門德宗造門樓外設兩廊持
兵宿衛謂之北衛元武門左曰銀漢門右曰青霄門唐
書兵志貞觀十二年置左右屯營於元武門領以諸衛
將軍會要神龍元年改元武門為神武制勝樓 含元
殿六典丹鳳門內正殿曰含元殿會要龍朔三年移仗

就蓬萊宮新作含元殿長安元年改為大明殿神龍元年復為含元唐書五行志含元路寢大朝會之所御也長安志含元殿南去丹鳳門四百餘步中無間隔左右寬平東西廣五百步賈黃中談錄殿前龍尾道自平地凡詰曲七轉由丹鳳北望宛如龍尾下垂於地兩垠欄悉以青石為之劇談錄龍尾道出於闕前每朝會禁軍御仗宿於殿庭金甲葆戈雜以綺繡羅列文武纓珮序立仰觀御座若在雲漢雍錄王仁裕曰含元殿前玉階

三級第一級可高二丈許每間引出一石螭頭東西鱗

次第二第三級各高五尺

三級以自上而下為次

級兩面龍尾道

各六七十步方達第一級皆花磚

唐李華含元殿賦維皇高祖穆端命於元

穹萬有千歲鍾景祚於洪裔建北宮之尊嚴上取法於天帝乃圖正殿之適居規崇山而定制信神明幽贊而人謀襲契不然何前王曠此之雄麗也先是大司空率其屬執度而相之曰美哉川原驚乎其大哉亘坤靈今配乾剛坤順乾而為龍舒廣衍兮走羣山紛却面而朝宗陵正陽之奕奕鬱佳氣之蔥蔥蓋昊天之作而黃祇授元聖獲以造新宮也乃審於龜筮龜筮協從太卜以告神人咸同皇曰欽哉是將宜於朕躬因以鴻稱含元建名易乾卦之說曰含宏光大又曰元亨利貞括萬象以為尊特巍巍乎上京則命徵盤石之匠下荆揚之材

操斧執斤者萬人涉磧礫而登崔嵬擇一幹於千木規
大壯於喬攷聲坎坎於青雲若神培而顛摧勢動連崖
拉風捩雷倒勁梢於窮谷斬巨抵於昭回時也山祇效
靈波神作氣為桴為棹羽疊鱗萃朝沉江漢夕出河渭
雲奔山橫交積於作宮之地於是農事既收靈臺勿亟
子來而就役者周邦畿而薄四海咸忘勞而獻力乃張
為廣庭考正極星邦伯是經國工研精剗盤岡以為址
太階積而三重因博厚而順高明築陵天之四墉四墉
既列太階如截下上相嶽愕視沉沉其始也星鉞電交
於萬堦霜鋸冰解於十尋擁材為山攢杆如林乃占日
月之吉以成帝室崇梁勁於中極棟橐臈以磐密析姑
繇以為楹隳喬山以為礪飛重簷以切霞烟素壁以留
日神標峻摘鬼疊層楣高卑迭作尋尺相持木從繩而
後正棟操宇而不危陞瑩冰級瓦敷鱗差蕩晶景而升
降歛睞肯以交輝聳大厦之奇傑勢將頓而復飛爰詔
有司練日推時徵考室於周頌會公卿以落之丕赫哉

如俯如跂若合若離森脩邃以宵徼悅岌業而巖巍謂
衝飈激海兮凝齋淪以無底奔雷觸山兮掉獻寧而傾
鼓石鮫拖首於堂無狀出雲而撐髻嵩高之制靈邱上
盤隣斗極之光耀邇天漢之波瀾密鑿柄之吞吐吸山
藂而水攢建升龍之大旆邈不至於階端崢嶸孱顏下
視南山炤燭無間七曜迴環歆歆赫以笑兀據閎宏以
蕭椒捧帝座於三辰銜天街於九達進而仰之騫龍首
而張鳳翼退而瞻之岌樹顛而萃雲末嶷兮莪莪巨鰲
載仙山而出滄波劃兮煌煌燭龍析穹穴而臨北方排
層城而廓帝居豁閭闔而面蒼蒼左翔鸞而右棲鳳翹
兩闕而爲翼環阿閣以周墀象龍行之曲直夾雙壺以
鴻洞啟重閨之呀眇趨堂塗而未半望宸居而累息惟
上聖之欽明爰德政而崇德去雕璣與金玉絀漢京之
文飾熾丹雘於峻嶒抗重霄而競色若乃紫微晨暄彤
墀夜明雲薄萬拱風交四榮冬止具陽則釋裘而煖夏
休其陰則捐絺以清旗獵風而振響葉墜露而成聲懸

櫺駢湊竦柱奔列複檻層綴高窻景燕駢翳日而果連
曜天開而中絕形持神而欲離足悽步而將跌貯昭訓
之崇崇璘光範之揭揭其南則丹鳳啟途遐矚荆吳十
扇開閉陰陽睢盱容鬲九局方駕五車示王者之無外
不樹屏於清都望仙闕於其後則深闌秘殿曼宇踈楹
而索元甲屯仡仡之駘夫其後則深闌秘殿曼宇踈楹
瑞木交陰元墀砥平鮮風歷廡凌散飄英陰藹武闌增
華穆清玉燭內融則嘉盛豐脩太陽照臨而天下文明
古有六寢御茲一人今也三朝繇古是因布大命於宣
政澹元心於紫宸羲和弭節於通乾望舒停景於觀象
密勿旒宸臣人是仰左黃閣而右紫微命伊臯以為長
其下則鶚冠魚服良家茂族厲禁非宜金吾領之其前
則置兩石以卹刑張三侯以興武告善之旌登聞之鼓
節畧漏於鐘律架為樓之筍簾以辨內外之差以正東
西之序天光流於紫庭倒景入於朱戶騰祥雲之郁靄
映旭日之蔥蘢清渠導於元氣玉樹生於景風平坦數

里徘徊無窮羅千乘與萬騎曾不得半乎其初經營天下既又文物未周孤其壯麗蓋重於施勞非不懷也乃眷睿孫睿孫開元萬物宴清而大和掩書契之所論既克廣於崇構聲明脩而益尊蓋聖皇之孝也輝焯變化兮動搖乾坤其束於是宏文教而開館對日華之清闕蓋左學之遺制協前王之講德其西於是延載筆之良史俯月華之峻扉集賢人於別殿朝命婦於中闈王風闡而成化陰教脩而不虧加以咏周詩而展親睦魯衛而敦叙因合族而來宴置更衣之豐宇至於殿內諸曹則左右有局通軒並廡物有恒司供無廢舉又有銀璫珥貂寺人巷伯奉宣出納之令更踐中宮之役熊羆之旅董以龍武矛戟森森材官羽林聲破邱山氣讐飛沈爪挾千鈞跟騰百尋克壯皇威協此其心其外則校人掌馬天駟在閑以脩順遊放牧其間望我鑾和陳彼高山猶慮憲章或遺國容未脩乃立掌匱之司館通事之吏職在達下情於上天儆王言於有位埏通太極

隆指龍池重門內注復道潛移幽峻肅以相屬光彤融
以熤熤懸象著明帝座維三皇居設位俯察仰參翼室
正中游宮次南北起含光其容眈眈總而言之如山之
壽則曰蓬萊如日之升則曰大明自茲而北燕遊所經
達於苑囿不可殫名周廬更阿匝以環衛南端百仞上
極霄際却視訖奎經迤廣深繚以層城然為重陰至若
時雨膏田九農悵暢雲歸山穴儵以昭曠白日麗於宮
隅混晶光而益壯於是風師飲威纖埃不升穎絕搖芒
葉無翻後自中徂外鏡洗川澄弦直閭闔井畫溝塍靡
迤秦山波陀漢陵知稼穡之艱難見皇王之廢興及乎
元冥戒寒海神飛雪瑤城粉野琪樹森列玉宇凝階雲
門露闕天華爽霽朗日朝徹赤旌降庭朱柱艷月仰白
帝而金精開據河宮而銀燭發其或遠方不至帝用興
戎降元帥於天上發神謀於禁中皇靈震耀殄厥渠凶
矯矯武臣此焉獻功操俘馘以陳器械恢莫大之威容
爾乃時殷仲冬日正南至上公奉葦羣后在位一人壽

昌萬國承賜式燕以樂欣欣且醉乃撞宮懸砮碣天地
及乎獻歲元辰東風發春懸法象魏與人惟新儼文物
於王庭兼九伐而宿陳威儀之嚴嶽嶽振振若太一披
網緼而俯百神既而咸造勿褻會朝清明璿栢指寅寢
闡發局皇帝御袞龍之法服佩蒼璧之純精執鎮圭導
朱絃降輦登階微聞玉聲於是典禮之官贊王就位南
面穆然至若甸侯采衛要荒閭貊輸其方貢因不來格
統以千官六卿二伯司儀叙進象胥重譯肅肅委皮乾
乾尊壁設以庭燎天烘地赫雷鼓殷殷朱干玉戚神籥
如生熊羆愕眙危昂歌向歆爛歆射金根玉輅太常少
伯火烈門旗霜交塹戟乃進元元以觀禮琕億兆之增
增金吾南首麾之以肱述攀援而聳仰齊屢企而冠騰
太史來告卿雲勃興灑豐澤於生人若上元之休徵申
命司寇緩刑冢卿降德秩山川而問耆老周雨露而均
邦國明良竭歡喜氣闐塞揭金鷄於太清炫晨光於正
色慶忻之聲不踰晨而滿四域當斯時也驅風驟漢於

廊煥爛王臨於朝天地貞觀靈宮巖巖上下交贊蓋所以法乾道而遵帝度豈惟安體而明威者哉夫瑤臺之美不可以型萬國土堦之陋不可以儀天下奢不孫而儉固先執中於大位洪範曰皇建其有極富哉上聖之宏議也詩歌楚室頌美泮宮諸侯之事也雲夢甘泉宴談景福辟王之志也論諸侯曷若以戴天子嘉辟王曷若以尊聖人烈烈盛唐祖武宗文五帝報德六王慚勛而政本乎慈用過乎儉夫蒼生所奉者惟君所愛者惟親寧有君親宅體於卑室而臣子得安其身乎故有熊明庭帝堯總期從人欲也天垂定星易有大壯君人法焉聖朝猶斥其華而憑其質今為是殿也惟鐵石丹青素無加飾焉身居元眇心與萬姓同歆畝之勞以是臨衆何衆不實以是享神何神不若雖欲宮崑崙而館不周城八極而隍四海猶未足儲鴻猷而俯丕耀豈咸醵一京之所能極哉策四瀆之前歲救懷鉛之小臣俾讎書於禁中王百代之遺文由是循環天造耳目日新敢頌

成功告於神明無媿斯干之什式昭聖德之容頌曰帝
作含元含元言言萃若日觀呀為天門太階三層遠法
崑崙鎮茲秦野揭以周原烈文祖宗永錫孝孫孝孫有
慶於以施令奄旬萬姓受天休命歌之頌之管磬宜之
穆穆皇君壽考無期既成斯文客有勸之上者對曰前
王之宏祥說瑞乃聖朝之細事今休徵已厭於聰明頌
聲亦飫於天意夫私歌竊忭乃臣子之常志又焉足以
薦聞哉客曰不然今至尊明發不寐永懷先皇周文之
孝也克恭克讓光溢海內帝堯之謙也自即位以來上
下之休嘉臣人之詠歌歌於睿躬則固辭頌於宗廟則
無敢今吾子之文昭乎累聖之狀光美於大君之孝德
可進而退宜言而默使推頌之音卷而不舒猶坦蕩其
胸臆無乃過歟為人之下者有可違乎君親雖濱於死
亦冒行之況宗廟或啟其心乎臣華嘗聞遷善之規願
附升歌之末
翔鸞閣栖鳳閣長安志含元殿東南有翔鳳閣

西南有栖鳳閣六典夾殿兩間左曰翔鸞右曰栖鳳注
與殿飛廊相接閣下即朝堂肺石登聞鼓如承天之制
鐘樓鼓樓長安志殿東南西南有鐘鼓樓又有金吾
左右仗院 通乾門觀象門六典注夾道東有通乾門
西有觀象門唐書儀衛志百官序班於通乾觀象門

宣政門六典含元殿北曰宣政門唐書儀衛志百官入
宣政門文班自東門入武班自西門入長安志朝堂東
廊有齊德門西廊有興禮門 宣政殿六典宣政門內

曰宣政殿兩京記含元殿後有宣政殿即正衙殿也朔望大冊拜則御之長安志宣政殿東有東上閣門西有西上閣門日華門長安志宣政殿前東廊曰日華門門下省長安志日華門東雍錄名左掖亦名東省通志省東有宏文館待制院雍錄閣本圖待制院在宣政殿之東少陽院之西蓋倣漢世待詔而立此官稱也武后名豐故凡詔皆改為制而待詔亦改待制也少陽院雍錄長慶元年於門下省東少陽院築牆及樓觀

史館長安志宏文館西自門下省少陽院史館皆南
出含耀門東出昭訓門北入崇明門 月華門長安志
宣政殿前西廊曰月華門 中書省在月華門一名右
掖亦名西掖南出光範門西出昭慶門北入光順門
政事堂雍錄在東省屬門下至中宗時裴炎以中書令
執政遂徙政事堂於中書省杜甫為左拾遺作紫宸殿
退朝詩有云宮中每出歸東省會送夔龍集鳳池鳳池
者中書也杜為左拾遺在肅宗時則政事堂已在中書

矣故出東省而集西省者就政事堂見宰相也御史

北臺按舒元興御史臺中書院記云御史府故事於中書之南常有理所太和四年於政事堂直阡之南選地以作之號中書南院院門北闢嚮朝廷也觀者命為御史北臺殿中內省長安志中書省北曰殿中內省通志內省西有命婦院北有親王待制院延英門六典宣政之右西上閣次西曰延英門延英殿六典延英門內之左玉海按六典會要延英在西上閣之西而李

唐賦乃曰左閣當宸誤矣會要憲宗元和十五年詔於西上閣門西廊西畔開便門以通宰相自閣中赴延英路則不在紫宸東矣長安志肅宗時梁上生玉芝一莖三花僖宗改為靈芝殿自蜀還復舊名尚書故實延英靈芝殿也謂之小延英苗韓公居相位以足疾步驟微蹇上每於此待之含象殿六典延英門內之右紫宸門六典宣政殿北紫宸殿六典紫宸門內即內朝正殿也雍錄宣政前殿也謂之衙衙有仗紫宸便殿也

謂之入閣其不御前殿而御紫宸也乃自正衙喚仗由
閣門而入百官候朝於衙者因隨以入見故謂之入閣
乾符已後因亂禮闕天子不能日見羣臣而見朔望故
正衙常日廢仗而朔望入朝有仗其後習見遂以入閣
為重至出御前殿猶謂之入閣 明義殿長安志在紫
宸殿西 蓬萊殿六典紫宸殿北玉海東有綾綺殿
浴堂門雍錄紫宸殿東 浴堂殿玉海館本圖在綾綺
殿南 珠鏡殿通志在綾綺殿東長安志東北有大角

觀 還周殿清暉閣兩京記蓬萊殿西承歡殿長安志

在還周南

唐宗楚客奉和人日清暉閣宴羣臣遇雪應制詩窈窕神仙閭參差雲漢間九重中葉起

七日早春還太液天為水蓬萊雪作山今朝上林樹無處不堪攀

金鑾殿兩京記還

周北雍錄金鑾坡者龍首山之支隴隱起平地而坡陀

靡迤者也其上有殿名為金鑾在蓬萊山西微南通志

殿西南有金鑾御院東學士院雍錄韋執誼故事云置

學士院後又置東學士院於金鑾殿之西

謹按會要有東翰林院在

金鑾殿之西即此

長安殿兩京記在金鑾殿西南蓬萊殿西

殿北有仙居殿仙居西北有麟德殿此殿三面故以三殿名南有閣東西皆有樓殿北相連各有障日閣內宴多在於此雍錄三院即三殿也結璘樓即三殿之西廊也鬱儀樓即三殿之東廊也鬱儀又東即寢殿矣鬱儀結璘皆重廊翰林院學士院皆在三殿西廊之外仙居殿後有拾翠殿杜甫詩賦詩拾翠殿東亭會慶亭通志在麟德殿北含涼殿長安志蓬萊殿後會要龍朔二年睿宗生於蓬萊宮含涼殿殿後有太液池長安志

池內有太液亭子雍勝畧蓬萊池一名太液池中有蓬

萊山 左銀臺門右銀臺門通志左門在宮城東面右

門在宮城西面六典紫宸殿東曰左銀臺門紫宸殿西

曰右銀臺門 內侍省右藏庫通志俱近右銀臺門

翰林門雍錄在大明宮右銀臺門內稍退北有門榜曰

翰林之門東向 學士院雍錄翰林門直西為學士院

院有兩廳南北相背而各自為門旁有板廊自南廳可

通北廳又皆南向院皆五門北廳從東來第一間常為

承旨閣餘皆學士居之廳前堦砌花磚為道南廳本駙馬張埒為學士時以居公主此其畫堂也後皆以居學士其東西四間皆為學士閣中一閣不居會要學士院者置在翰林院之南別戶東向自建院後李白韓翊之徒並在舊翰林院中假其名而無職其入直者並以文詞共掌詔敕自此北翰林始無學士之名翰林院雍錄學士院北廳又北則為翰林院會要翰林院者初置在銀臺門內麟德殿西廂重廊之後少陽院雍錄翰

林院入北則為少陽院

謹按此在宮西別有門下省少陽院

九仙門長

安志右銀臺門北

大福殿通志九仙門內東為三清

殿又東為含冰殿又東為承香殿殿北有長閣東有紫

蘭殿紫蘭北有元武殿

五王內院長安志宣宗時夔

王以下五王居大明宮內院侍讀五日一入乾符門講

讀問安宮長安志昭宗傳位於太子居東內為問安

宮

已上東內大明宮

飛霜殿實錄太宗貞觀二十年七月宴五品以上於飛

霜殿綠竹遞奏羣臣上壽賜綾錦殿在元武門北因地形高敞層閣三成引水為潔淥池以滌炎暑

觀德殿玉海元武門之外

白華殿雍錄在大明東苑之東

集賢院玉海開元十一年分置此院大明宮外院內東西八十步南北六十九步院中有仰觀臺即一行師占候之所

教坊長安志唐紀曰元宗置左右教坊於蓬萊宮側帝

自為法曲俗樂以教宮人號皇帝梨園弟子 魚藻宮

玉海禁苑池中有山山上建魚藻宮在大明宮北

南內興慶宮唐書地理志在皇城東南距京城之東開
元初置至十四年又增廣之謂之南內會要初上在藩
邸與宋王成器等同居興慶里人號曰五王宅至是為
宮焉玉海舊史開元二年以隆慶舊邸為興慶宮在隆
慶坊元宗名隆基改興慶長安志開元二十年築夾城
入芙蓉園自大明宮夾東羅城經通化門以達此宮又

經春明延喜門至曲江芙蓉園而外人不知也

唐元宗兄弟同

遊興慶宮作代邱青門右離宮紫陌陸庭如過沛日水
若度江時綺觀連鷄岫朱樓接雁池從來敦棣萼今此
茂荆枝萬葉傳餘慶十年志不移憑軒聊矚目輕輦共
追隨務本方從訓相輝保羽儀時康俗易漸德薄政難
施鼓吹迎飛蓋絃歌送羽庖所希覃率土孝弟一同規
王維奉和聖製從蓬萊向興慶閣道中留春雨中春望之
作應制渭水自縈秦塞曲黃山舊繞漢宮斜鑒興迴出
千門柳閣道迴看上苑花雲裏帝城雙鳳闕雨中春樹
萬人家為乘陽氣行時
令不是宸遊玩物華

興慶門金明門六典宮之西曰

興慶門次南曰金明門宮之東曰金花門次南曰初陽

門宮之南曰通陽門宮之北曰躍龍門

一作龍門

勤政

務本樓唐書讓皇帝傳先天後以隆慶舊邸為興慶宮
於宮西南置樓南曰勤政務本之樓樂志元宗教舞馬
百匹舞於勤政樓下後賜宴設醕亦於勤政樓 花萼

相輝樓長安志置宮後寧王憲申王撝岐王範薛王業
邸第相望環於宮側明皇因題花萼相輝之名取詩人

棠棣之義帝時登樓聞諸王音樂咸召升樓同榻宴謔

唐元宗首夏花萼樓觀羣臣宴寧王山亭回樓下又申
之以賞樂賦詩今年通閏月入夏展春輝樓下風光晚
城隅宴賞歸九歌揚政要六舞散朝衣天喜時相合人
和事不違禮中推意厚樂處感心微別賞陽臺樂前句

欽定四庫全書

卷五

暮雨

大同門長安志花萼樓之北曰大同門 大同

殿六典大同門內長安志殿左右有鐘樓鼓樓天寶七

載大同殿柱產玉芝

唐王維大同殿柱產玉芝龍池上
有慶雲神光照殿百官共觀聖恩

便賜宴樂敢書即事欲笑周文歌宴鎬還輕武帝樂橫
汾豈如玉殿生三秀詎有銅池出五雲陌上荒尊傾北

斗樓前舜樂動南薰共歡天
意同人意萬歲千秋奉聖君

翰林院長安志大同門

內學士院記駕往興慶宮則置院金明門內 明義門

長安志通陽門西 長慶殿長安志明義門內按唐雜

記曰明皇為太上皇居興慶宮每置酒長慶樓南俯大

道裴裒觀覽 明光門六典通陽門北入曰明光門會
典太和三年修明光樓 龍池雍勝畧景龍池本為隆
慶池以諱元宗名改興慶池立宮後謂之龍池景龍文
館記興慶池在隆慶坊本是平地垂拱後因雨水流潦
成小池近五王宅號為五王子池六典元宗隆慶坊舊
宅有井忽湧為小池周袤十數丈常有雲氣或黃龍出
其中景雲間浸廣里中人悉移居遂為龍池長安志武
后時民井溢浸成大池數十頃號隆慶池丞相王子列

第其北望氣者言常鬱鬱有帝王氣中宗神龍五年幸

池上宴侍臣以厭之通志中有龍堂

唐韋元旦興慶池侍宴應制詩滄池

泝沆帝城邊殊勝昆明鑿漢年夾岸旌旗疏輦道中流
蕭鼓振樓船雲峯四起迎宸幄水樹千重入御筵宴樂
已深魚藻詠承恩更欲奏甘泉張說侍宴興慶池應制
詩靈池月滿直城隈敲帳天臨御路開東沼初陽疑吐
出南山曉翠若浮來魚龍百戲紛容與鳬鷗雙舟較沂
洄願似金隄青草腹長承瑤水白雲杯沈佺期龍池篇
龍池躍龍龍已飛龍德先天天不違池開天漢分黃道
龍向天門入紫微卽第樓臺多氣色君王鳬雁有光輝
為報寰中百川水來朝此地莫東歸又興慶池侍宴應
制詩碧水澄潭映遠空紫雲香駕御微風漢家城闕疑
天上秦地山川似鏡中向浦回舟萍已綠分林蔽殿槿
初紅古來徒羨橫汾賞今日宸遊聖藻雄宋蘇舜欽興

慶池詩餘潤漲龍渠疏溜連清漚助曉遠昏山浮秋明
刮眼魚歸別浦間雁下蒼波晚岸北有高臺離魂蕩無
限范純仁和韓侍中上巳日會興慶池詩波漲朱欄外
山明綺席前畫橈飛彩鷁紅旆照清遶東閣隨開府佳
賓盡謫仙夕陽歸
騎外芳草綠綿綿

沉香亭長安志龍池東有沉香亭

松牕錄開元中禁中初種木芍藥得四本上因移於興
慶池東沉香亭前唐詩紀事禁中木芍藥開上賞之妃
子從帝曰賞名花對妃子焉用舊樂詞為命李龜年持
金花牋賜李白為清平樂詞梨園子弟撫絳竹李龜年
歌之上親調玉笛以倚曲每曲遍將換則遲其聲以媚

之太真以玻璃七寶杯酌西涼葡萄酒笑飲 瀛洲門

長安志興慶殿前 南熏殿長安志瀛洲門內 興慶

殿長安志宮內正殿曰興慶殿即正衙殿也在通陽門

北 交泰殿長安志興慶殿後會要天寶十載四月造

仙雲門六典瀛洲之左 新射殿六典仙雲門內

芳苑門六典濯龍門內左麗苑門六典濯龍門內右

金花落長安志在宮之東俗所傳蓋衛士居 同光門

承雲門初陽門飛軒門玉華門飛仙殿同光殿榮光殿

俱見
六典

宣天門睿武門

俱見長安志
已上南內興慶宮

通義宮玉海興慶寺通義坊本高祖舊宅武德元年為
宮貞觀元年為尼寺會要武德六年四月幸潛龍舊宅
改為通義宮置酒高會

太清宮唐書元宗本紀天寶二年改西京混元宮曰太
清宮雍錄開元二十九年詔兩京及諸州各置元元皇
帝廟一所後改為太清宮以白石為元元皇帝真像袞
冕之服當宸南向元宗肅宗真容侍立左右

望春宮唐書地理志京兆萬年縣有南望春宮臨滻水西岸有北望春宮宮東有廣運潭姚南仲傳南仲於代宗時上疏曰王者必據高明燭幽隱先皇所以因龍首而

建望春也

唐蘇題奉和春日幸望春宮應制東望春春可憐更逢晴日柳含煙宮中下見南山近

城上平臨北斗懸細草偏承回輦處輕花微落奉觴前宸遊對此歡無極鳥弄歌聲入管絃張說奉和聖製春日幸望春宮應制別館芳菲上苑東飛花澹蕩御筵紅城臨渭水天河靜闕對南山雨露通繞殿流鶯凡幾樹當蹊亂蝶許多叢春園既醉心和樂共識皇恩造化同

翠微宮雍錄武德八年造名太和在終南山貞觀二十

一年改翠微宮冊府元龜翠微宮籠山為苑自初裁至
於設幄九日而罷功因名翠微宮正門北開謂之雲霞
門視朝殿名翠微殿寢殿名含風殿并為皇太子構別
宮去臺連延里餘正門西開名金華門內殿名喜安殿
唐太宗秋日翠微宮詩秋光凝翠嶺涼吹肅離宮荷疎
一蓋缺樹冷半帷空側陣移鴻影園花釘菊叢攄懷俗
塵外高眺
白雲中

望賢宮雍錄在咸陽縣東數里元宗幸蜀還京肅宗至
望賢宮奉迎德宗西幸又自望賢宮出奉天也

華清宮雍勝畧在臨潼縣南唐書地理志京兆府昭應縣有宮在驪山下貞觀十八年置咸亨二年始名溫泉宮天寶六載更溫泉曰華清宮宮有湯井環山列宮又築羅城置百司及十宅雍錄溫泉在驪山與帝都密邇自秦漢隋唐人主皆嘗遊幸惟元宗特侈蓋即山建宮百司庶府皆行各有寓止自十月徃至歲盡乃還大抵宮殿包括驪山一山而繚牆周遍其外觀風殿有複道可以潜通大明賈氏談餘華清宮殿廢已久今所存惟

繚垣而已天寶所植松栢徧滿崖谷望之鬱然唐徐安貞從駕

溫泉宮詩神女調溫液年年侍聖人試開臨水殿來洗
屬車塵暖氣隨明主恩波淡近臣靈威自無極從此獻
千春王維華清宮詩紅樹蕭蕭閣半開上皇曾幸此宮
來至今風俗驪山下村笛猶吹阿湓堆李賀過華清宮
詩春月夜啼鴉宮簾隔御花雲生朱絡暗石斷紫錢斜
玉腕盛殘露銀燈點舊紗蜀王無近信泉上有片芽張
繼華清宮詩天寶承平奈樂何華清宮殿鬱嵯峨朝元
閣峻臨秦嶺羯鼓樓前俯渭河玉樹長飄雲外曲霓裳
閒舞月中歌只今惟有溫泉水鳴咽聲中感慨多王建
溫泉宮行十月一日天子來青繩御路無塵埃宮前內
裏湯各別每箇白玉芙蓉開朝元閣向山上起城繞青
山籠暖水夜開金殿看星河宮女知更月明裏武皇得
仙王母去山鵲盡鳴宮中樹溫泉泱泱出宮流宮使年
年修玉樓禁兵去盡無射獵日夕麋鹿登城頭梨園弟

子偷曲譜頭白人間教歌舞杜牧華清宮三十韻繡嶺
明珠殿層巒下綵牆仰窺丹檻影猶想赭袍光昔帝登
封後中原自古強一十年際會三萬里農桑几席延充
舜軒墀接禹湯雷霆馳號令星斗煥文章釣築乘時用
芝蘭在處芳北扉閑木索南面富循良至道思元圃平
居厭未央鈞陳裏巖谷文墜厭青蒼歌吹千秋節樓臺
八月涼神仙遠縹緲環珮碎丁當泉暖涵窓鏡雲嬌惹
粉囊嫩嵐滋翠葆清渭照紅粧帖泰生靈壽歡娛歲序
長月聞仙曲調霓作舞衣裳雨露偏金穴乾坤入醉鄉
玩兵師漢武迴手倒干將鯨鬣掀東海胡牙揭上陽宣
呼馬嵬血零落羽林槍傾國留無路還魂怨有香蜀峯
橫慘淡秦樹遠微茫鼎重山難轉天扶業更長望賢餘
故老花萼舊池塘往事人誰問幽襟淚獨傷碧簷斜送
日殷葉半凋霜迸水傾瑤砌踈風躡玉房塵埃羯鼓索
片段荔枝筐鳥啄摧寒木端涎蠹畫梁孤烟知客恨遥
起秦陵傍又過華清宮詩長安迴望繡成堆山頂千門

次第間一騎紅塵妃子笑無人知是荔枝來溫庭筠過
華清宮二十二韻憶昔開元日承平事勝遊貴妃專寵
幸天子富春秋月白霓裳殿風乾羯鼓樓闌鷄花蔽膝
騎馬玉搔頭繡韞千門妓金鞍萬戶侯薄雲歛雀扇輕
雪犯貂裘過客聞韶籟居人識冕旒氣和春不覺烟暖
霏難收澁浪和瓊甃晴陽上彩旂存卷衣輕髻嬾窺鏡淡
娥羞屏掩芙蓉帳簾褰玳瑁鉤重瞳分渭曲纖手指神
州御案迷萱草天袍妬石榴深巖藏浴鳳鮮濕媚潛虬
不料邯鄲蟲俄成即墨牛劍鋒揮太皞旗焰拂蚩尤內
嬖陪行在孤臣預坐籌瑤簪遺翡翠霜仗駐驂騑艷笑
雙飛斷香魂一笑休早梅悲蜀道高樹隔昭邱朱閣重
宵近蒼崖萬古愁至今湯殿水鳴咽縣前流盧綸華清
宮詩水氣朦朧暖畫梁一田開殿滿山香宮娃幾許經
歌舞白首翻令憶建章張籍華清宮詩溫泉流入漢離
宮宮樹行行浴殿空武帝舊時人欲盡青山空閉御牆
中崔魯華清宮詩門橫金鎖悄無人落日秋聲渭水濱

紅日下山寒寂寂
濕雲如夢雨如塵

北門長安志華清宮北向正北門

外有左右朝堂相對有望仙橋左右講武殿 津陽門

長安志宮北正門之內曰津陽門門外有宏文館

唐鄭
嵎津

陽門詩并序津陽門者華清宮外闕南局禁闌北走京
道開成中嵎常下帷於石甕僧院多闔宮中陳迹今年
冬自號來暮及山下因解鞍謀餐客旅邸而主翁年且
艾自言及事明皇夜闌酒餘復為嵎道承平故事冀日
於馬上輒裁刻俚叟之語為長句七言詩凡一千四百
字成一百韻津陽門北臨通達雪風獵獵飄酒旗泥寒
款段蹶不進疲童退問前何為酒家顧客催解裝案前
羅列樽與卮青錢墮肩安足數白醪軟美甘如飴開壚
引滿相獻酬枯腸渴肺忘朝饑愁憂似見出門去漸覺
春色入四肢主翁移客挑華燈雙肩隱膝烏帽歌笑云

鮫老不為禮飄蕭雪鬢雙垂頤問余何往凌寒曦顧翁
枯朽郎豈知翁曾豪盛客不見我自為君陳昔時時平
親衛號羽林我纔十五為孤兒射熊搏虎衆莫敵彎弧
出入隨飲飛此時初創觀風樓簷高百尺堆華棧樓南
更起闕難殿晨光山影相參差其年十月移禁仗山下
柳北羅百司朝元閣成老君見會昌縣以新豐移幽州
曉進供奉馬玉珂寶勒黃金羈五王扈駕夾城路傳聲
校獵渭水涓羽林六軍各出射籠山絡野張置維彤弓
繡韞不知數翻身滅沒皆城眉赤應黃鵠雲中來妖狐
狡兔無所依人煩馬殆禽獸盡百里腥腥木黍稀暖山
度獵東風微宮娃賜浴長湯池刻成玉蓮噴香液漱迴
烟浪深邃迺屏屏象薦雜羅列錦鳧繡雁相追隨破簪
碎鈿不足拾金溝殘溜和纓綬上皇寬容易承事十家
三國爭光輝繞牀呼盧恣博張燈達晝相謾欺相君
侈擬縱驕橫日夜秦詭多游嬉朱衫馬前未滿足更驅
武卒羅旌旗畫輪寶軸從天來雲中笑語聲融怡鳴鞭

後騎何蹀躞宮粧傑袖皆仙姿青門紫陌多春風風中
數日殘春遺驪駒吐沫一奮迅路人擁篲爭珠璣八姨
新起合歡堂翔鵲賀燕無由窺萬金酬工不肯去矜能
侍巧猶嗟咨四方節制傾附媚窮奢極侈沽恩私堂中
特設夜明枕銀燭不張光鑒帷瑤光樓南皆紫禁梨園
仙宴臨花枝迎娘歌喉玉甯篠蠻兒舞席金歲鞋三郎
紫笛弄烟月怨如別鶴呼羈雌玉奴琵琶龍香撥倚歌
促酒聲嬌悲飲鹿泉遣春露晞粉梅檀杏飄朱墀金沙
洞口長生殿玉藥峯頭王母祠禁庭衛士多幻化上前
較勝紛相持羅公如意奪顏色三藏袈裟成散綵蓬萊
池上望秋月無雲萬里懸清輝上皇夜半月中去三十
六宮愁不歸月中秘樂天半聞丁璫玉石和墮簾宸聰
聽覽未終曲却到人間還是非千秋御節在八月會同
萬國朝華夷花萼樓南大合樂八音九奏鸞來儀都盧
尋橈誠醒齷公孫劍伎方神奇馬知舞徹下牀榻人惜
曲終更羽衣祿山此時侍御側金雞畫仗當罌恩繡綉

衣襟日負屬甘言狡計愈嬌癡詔令上路建甲第樓通
走馬如飛鞚大開內府恣供給玉缶金筐銀簫異謀
潛熾促歸去臨軒賜帶盈十圍忠臣張公識逆狀日日
切諫上弗疑湯成召浴果不至潼關已溫漁陽師御街
一夕無禁鼓玉輅順動西南馳九門迴望塵坐多六龍
夜馭兵衛疲縣官無人具軍項行宮敵屋屠雲螭馬嵬
驛前駕不發宰相射殺冤者誰長眉鬢髮作凝血空有
君王潛涕洟青泥坂上到三蜀金堤城邊止九旗移文
泣祭昔臣墓度曲悲歌秋雁辭明年尚父上捷書洗清
觀闕收封畿兩君相見望賢頓君王鼓舞皆歆歆宮中
親呼高驃騎潛令改葬楊真妃花膚雪艷不復見空有
香囊和淚滋鑒與却入華清宮滿山紅實垂相思飛霜
殿前月悄悄迎春亭下風颼颼雪衣女失玉籠在長生
鹿瘦銅牌垂象牀塵凝冠佩被畫簷蟲網頗梨碑碧菱
花覆雲母陵風篁雨菊低離披真人影帳偏生草果老
藥室空掩扉鼎湖一日失弓劍橋山烟草俄霏霏空聞

玉枕入金市但見銅壺飄翠微開元到今踰十紀當初
事迹皆殘藁竹花唯養接梧鳳水藻周游巢葉龜會昌
御宇斥內典去留二教分黃縑慶山汙渚石甕毀紅樓
綠閣皆支離奇松怪栢為樵蕪童山皆谷忘嶮巖烟中
壁碎庠詰畫雲間字失元宗詩石魚巖底百尋井銀牀
下卷紅綆逢當時清影映紅葉一旦飛埃埋素規韓家
燭臺倚林杪千枝嘹若山霞擣昔年光彩奪天月昨日
銷鎔當路岐龍宮御榜高可惜火焚牛挽臨崎峴孔雀
松殘赤琥珀駕鵞瓦碎青琉璃今我前程能幾許徒有
餘息精力羸逢君話此空灑涕却憶歡娛無見期主翁
莫泣聽我語寧勞感舊休吁嘻河清海宴不難覩我皇
已上昇平基湟中土地昔湮沒昨夜收復無瘡痍單于
北走棄青塚戰馬西奔空月支喜逢堯年豈易偶願
翁頤養豐膚肌平明酒醒便分手今夕一樽翁莫違

開陽門長安志宮之東面正門也門外有宜春亭望

京門長安志宮之西面正門也門外近南有御交道上
嶺通望京樓望昭陽門長安志宮之南面正門也今謂
之山門門外有登朝元閣路本唐之御輦便路也 瑤

光樓長安志津陽門之東曰瑤光樓樓南有小湯臨潼
縣志小湯之西有梨園 飛霜殿長安志瑤光樓南曰
飛霜殿寢殿也白少傅以長生殿為寢殿非也 御湯

九龍殿長安志在飛霜殿之南亦名蓮花湯明皇雜錄
元宗幸華清新廣湯池制作宏麗安祿山於范陽以白

玉石為魚龍鳬鴈石梁石蓮花以獻雕鐫巧妙殆非人工上大悅命陳於湯中仍以石梁橫亘其上而蓮花纔出水際上因幸解衣將入而魚龍鳬鴈皆若奮鱗舉翼狀欲飛去上甚恐遽命撤去而蓮花石至今猶存焉賈氏談錄湯池凡一十八所第一是御湯周迴數丈悉砌以白石瑩澈如玉面皆隱起魚龍花鳥之狀四面石坐階級而下中有雙白石蓮泉眼自甕口中湧出噴注白蓮之上

唐元宗惟此溫泉是稱愈疾豈予獨受其福思與北人共之乘暇巡遊乃言其志桂殿與山連

蘭湯湧自然陰崖含秀色溫谷吐潺湲績爲黜邪若功
因養正宣願言將億兆同此共昌延張說奉和聖製溫
泉言志應制詩溫谷媚新豐驪山橫半空湯池薰水殿
翠木暖烟宮起疾逾仙藥無私合聖功始知堯舜德心
與萬人同盧象駕辛溫泉詩傳聞聖主幸新豐清蹕鳴
鑾出禁中細草終朝隨步輦垂楊幾處繞行宮千官扈
從驪山北萬國來朝渭水東此日小臣徒獻賦漢家誰
復重揚雄王維和太常韋主簿五郎溫湯寓目之作漢
主離宮接露臺秦川一半夕陽開青山盡是朱旗繞碧
澗朝從玉殿來新豐樹裏行人度小苑城邊獵騎迴聞
道甘泉能獻賦懸知獨有子雲才皇甫冉溫泉卽事詩
天仗星辰轉霜冬景氣和樹含溫液潤山入繚垣多承
相金錢賜平陽玉輦過魯儒求一謁無路獨如何陸龜
蒙湯泉詩暖殿流湯數十間玉渠香細浪迴環上皇初
解雲衣浴珠權時敲琴瑟山羅帶溫泉詩一條春水救
莓苔幾繞元宗浴殿回此水貴妃曾照影不堪流入舊

宮來

玉女殿長安志今名星晨湯南有玉女殿北有虛

閣閣下即湯泉二玉石甕湯所出也三秦記驪山湯舊

說以三牲祭乃得入可以去疾消病不爾即爛人肉俗

云始皇遇神女戲不以禮神女唾之生瘡始皇怖謝為

出溫泉洗除後人因以為驗日華門臨潼縣志由蓮

花湯而西曰日華門門之南曰太子湯長安志太子湯

次西少陽湯少陽湯次西尚食湯尚食湯次西宜春湯

臨潼縣志宜春湯有前殿後殿又西曰月華門笋殿

臨潼縣志月華門之內有笋殿雍錄殿側有魏溫泉頌

碑其石瑩徹見人形影宮人號玻璃碑

謹按碑今移置山下靈泉觀中

長湯臨潼縣志笋殿北有長湯十六所津陽門詩注

宮內除供奉兩湯外而內外更有十六所長湯每賜諸

嬪御其修廣與諸湯不侔甃以文瑤密石中央有玉蓮

捧湯泉噴以成池又縫綴錦繡為鳬鴈致於水中上時

於其間泛釵鏤小舟以嬉遊焉芙蓉湯臨潼縣志一

名海棠湯在蓮花湯西沈埋已久人無知者近修築始

出石砌如海棠花俗呼為楊妃賜浴湯 七聖殿臨潼
縣志芙蓉湯北有七聖殿長安志神堯太宗高宗中宗
睿宗明皇肅宗皆立衣衾衣統殿石榴皆太真所植南
有功德院其間瑤壇羽帳皆在焉順興影堂果老藥室
亦在禁內 宜春亭雍錄在開陽門外 重明閣長安
志四聖殿北倚欄北瞰縣境如在諸掌閣下有方池中
植蓮花池東鑿井盛夏極甘冷邑人汲之 四聖殿重
明閣之南殿東有怪柏 長生殿長安志齋殿也有事

於朝元閣即齋沐此殿山城內多馴鹿有流澗號鹿飲

泉金沙洞玉藥峯皆元宗命名洞居殿之左玉藥峯上

有王母祠 朝元閣賈氏談錄在北山嶺之上基趾最

為峻絕次東即長生殿故基冊府元龜天寶七載十二

月元元皇帝降於朝元閣改為降聖閣雍錄閣南有連

理木丹霞泉

唐儲光義降聖觀詩一山盡天苑一峯開
道宮道花飛羽衛天鳥游雲空玉殿俯元

水春旗搖素風夾門小松柏覆井新梧桐自昔大仙下
乃知元化功神皇作桂館此意與天通宋杜常朝元閣

詩行盡江南數十程曉風殘月入華清
朝元閣上西風急都入長楊作雨聲

老君殿長安

志朝元閣南有老君殿玉石為像製作精絕 鐘樓雍

錄朝元閣之東 明珠殿雍錄長生殿之南近東也

望風樓津陽門詩注樓在宮外東北隅屬夾城而達於

內前臨馳道周視山川 鬪雞殿雍錄在觀風樓之南

殿內有按歌臺南臨東繚牆長安志殿北有舞馬臺

毬場長安志宜春亭之北門外曰毬場其西曰小毬場

羯鼓樓長安志在朝元閣東近南繚牆之外

已上華清宮

萬全宮會要儀鳳三年於藍田作涼宮名萬全宮永淳

二年廢唐書高宗本紀永淳元年七月作萬金宮

龍躍宮雍勝畧唐高祖舊宅在高陵縣西十四里武德
六年以奉義宮改建高祖其先本成紀人後魏時王大
父熙為金門鎮將戍武川因家焉祖虎伐魏有功封唐
國公父昞襲爵生高祖於長安則龍躍宮或昞別宅抑
或高祖離宮乎德宗改為修真觀中有神堯御容及御
井霜柏梁開平中廢但龍泉寺在其旁或因是而名今
其地稱李觀所存乃卧龍寺

游龍宮雍勝畧在渭南縣西十一里唐開元中修按兩
京道里記云取黑龍飲渭名之白樂天有黑龍飲渭賦
武平一登驪山詩有日下黑龍川句亦謂此也

關中勝蹟圖志卷五

欽定四庫全書

關中勝蹟圖志卷六

陝西巡撫臣畢沅撰

古蹟

苑囿附
第宅

西安府周靈囿詩大雅王在靈囿孟子文王之囿方七
十里又靈臺左傳注在京兆鄠縣周之故臺今鄠縣東
五里有鄠宮又東二十五里有靈囿囿中有臺詩大雅
經始靈臺三輔黃圖臺高二丈周四百二十步又靈沼

三輔黃圖在長安西三十里詩大雅王在靈沼集傳臺下有囿囿中有沼也

臣謹按靈臺在靈囿中雍勝畧云靈囿在長安西四十里跨鄠縣境今舊址無存惟靈臺故基巋然在灋河西岸秦渡鎮北明秦藩改為佛寺
臣於乾隆三十九年親往相度加修葺焉

漢上林苑雍勝畧即秦之舊苑也其故基跨今盤屋鄠長安咸寧藍田五縣之境水經注武帝微行以為道遠

勞苦又為百姓所患乃使太中大夫吾邱壽王與待詔能用算者舉籍阿城以南盤屋以東宜春以西提封頃畝及其價值屬之南山以為上林苑東方朔諫秦起阿房而天下亂因陳泰階六符之事上乃拜太中大夫卒起上林苑故相如請為天子遊獵之賦稱烏有先生亡是公而奏上林也漢舊儀上林苑中廣長三百里苑中養百獸天子春秋射獵苑中取獸無數其中離宮七十所容千乘萬騎西都賦西郊則有上林禁苑林麓藪澤

陂池連乎蜀漢繚以周墻四百餘里離宮別館三十六
所神池靈沼往往而在關中記上林苑門十二中有苑
三十六宮十二觀二十五西京雜記初修上林苑羣臣
遠方各獻名果異卉三千餘種其中亦有制為美名以
標奇麗也 承華殿漢武故事七月七日上林承華殿
齋正中忽有一青鳥從西北方來甫頃王母至 鳳凰
殿長安志宣帝神爵四年鳳凰集上林迺作鳳凰殿以
答嘉瑞 平樂館漢書武帝本紀武帝元封六年夏京

師民觀角觝於上林平樂館注平樂館大作樂處 繭

館漢書元后傳注師古曰漢宮闕疏云上林苑有繭館

蓋蠶繭之所也 上蘭館漢書元后傳注師古曰上蘭

館名也在上林中 涿沐館長安志宣帝許美人居上

林涿沐館數召入飾室 礪氏館漢書郊祀志上求神

君舍之上林中礪氏館注如淳曰礪音蹄 鹿館長安

志外戚傳成帝許美人在上林鹿館數召入飾室 新

臺長安志上林賦曰登新臺在豐水西北近渭今鄠縣

也 清臺雍錄漢志曰武帝造太初厯即上林清臺課
候則清臺在上林苑中矣三輔黃圖曰漢靈臺在長安
西北八里漢始曰清臺後更名曰靈臺 蠶室長安志
減宣怒其吏成信信亡藏上林中宣使郿令將吏卒闌
入上林中蠶室門 延壽門長安志平帝迎王皇后自
上林延壽門入未央宮前殿 昆明池雍勝畧在長安
縣西南三十里豐邑鄉鵲鵲莊三輔黃圖昆明池漢武
帝元狩四年穿圃曰上林苑有昆明池史記平準書越

欲與漢用船戰遂乃大修昆明池列觀環之治樓船高
十餘丈旗幟加其上甚壯關中記昆明池漢武習水戰
也中有龍沼神池云堯時治水訖停舟於此蓋堯時已
有汙池漢代因而廣深耳三輔故事昆明池三百二十
五頃池中有豫章臺及石鯨刻石為鯨魚長三丈每至
雷雨常鳴吼鬣尾皆動立石牽牛織女於池之東西以

象天漢

周庾信和春日晚宴昆明池詩春餘足光景
趙李舊經過上林柳腰細新豐酒徑多小船行

釣鯉新盤待摘荷蘭皋徒稅駕何處有凌波唐宋之問
奉和晦日幸昆明池應制詩春豫靈池會滄波帳殿開

舟凌石鯨度搖拂斗牛迴節晦賞全落春逢柳暗催象
溟看浴景燒劫辨沈灰鎬飲周文樂汾歌漢武才不愁
明月盡自有夜珠來沈佺期昆明池侍宴應制詩武帝
伐昆明穿池習五兵水同河漢在館有豫章名我后光
天德垂衣文教成黷兵非帝念勞物豈皇情春仗過鯨
沼雲旗出鳳城靈魚銜寶躍仙女廢機迎柳拂旌門暗
蘭依帳殿生還如流水曲日晚棹歌清

豫章觀三輔黃圖武帝造在昆

明池中亦曰昆明觀三輔故事昆明池中有龍首船常
令宮女泛舟池中張鳳蓋建華旗作櫂歌雜以鼓吹帝
御豫章觀臨觀焉 昆靈池百子池初學記上林苑中
積草池三輔黃圖上林苑有積草池 剡池漢武故

事上林苑蒯池生蒯草以織席 牛首池上林賦濯鷁

牛首張揖曰牛首池名上林苑西頭太平寰宇記野韭

澤即漢牛首池地在內苑西豐水西北 西陂池東陂

池印池三輔黃圖皆在上林苑中 飛廉觀三輔黃圖

在上林苑武帝元封二年作飛廉神禽能致風氣者身

似鹿頭如雀有角而蛇尾文如豹武帝命以銅鑄置觀

上因以為名班固漢武故事曰公孫卿言仙人好樓居

於是上於長安作飛廉觀高四十丈 陽祿觀柘觀長

安志班婕妤生子陽祿觀師古曰二觀並在上林苑中
雲林觀包陽觀犬臺館當路館鼎郊館朗池觀博望
觀膠木觀便門觀華元觀益樂觀明光觀三輔黃圖並

在上林苑中

已上俱
上林苑

博望苑雍錄武帝為戾太子立博望苑使通賓客苑在
漢長城外漕渠之北至成帝始撤去

御宿苑三輔黃圖在長安城南御宿川中漢武帝為離
宮別館禁御人不得往來遊觀止宿其中故曰御宿又

御羞苑通志漢書武帝元鼎二年初置水衡都尉掌上林苑有五丞屬官有御羞苑禁圃令如淳曰御羞地名在藍田其土肥沃多出御物可進者師古以為即御宿川非是

宜春下苑三輔黃圖在京城東南隅雍錄宜春之名漢史凡三有曰宜春苑者地屬下杜有曰宜春宮者即下杜苑中宮也有曰宜春觀者則在鄠縣雖三其名而實止兩地也

樂遊苑雍勝畧樂遊原上有樂遊苑一曰樂遊園去咸

寧縣八里漢書宣帝本紀宣帝神爵二年春起樂遊苑

兩京新記宣帝樂遊廟

謹按關中記宣帝立廟於曲江之北號樂遊

亦名樂

遊原亦名樂遊苑地基最高四望寬敞

唐李頰樂遊苑春望詩五陵佳

氣晚氤氲霸業雄圖勢自分秦地山河連紫塞漢家宮殿入青雲未央樹色春中見長樂鐘聲月下聞無那楊花起愁思滿天飄落雪紛紛

代邸漢書文帝本紀代王至渭橋太尉勃上天子璽代王謝曰至邸而議之閏月己酉入代邸羣臣從至議請

即天子位代王西向讓者三南向讓者再遂即天子位
羣臣奉天子法駕迎代邸皇帝即日夕入未央宮

丞相府西京雜記平津侯公孫宏自以白衣為丞相乃
大開東閣營客館招延天下士人其外曰欽賢之館以
待大賢之士次曰翹材之館以待大材之士又次曰接
士之館以待國士其有德有賢可佐理陰陽者處之欽
賢館其有材堪將軍二千石者居翹材之館其有一介
之善一方之藝者居接士之館所得俸祿以奉之

三輔廨雍錄三輔黃圖曰三輔者主爵中尉及左右內史武帝改曰京兆尹左馮翊右扶風共治長安中是為三輔郡皆有都尉又曰京兆在故城尚冠里馮翊在故城內太上皇廟西扶風在夕陰街北此其廨治之所也長安志中尉府在尚冠里街東京兆尹即廢中尉府也御史府通典漢御史所居曰御史府亦曰御史大夫寺在大司馬門內無塾其門用梓板不覆色亦謂之憲臺漢書朱博傳傳御史府中列栢木常有野鳥數千棲宿其

上晨去暮來號曰朝夕烏

司隸府漢舊儀司隸府治即孝武帝廟也

鴻臚府長安志王莽以鴻臚府為定安太后宮

蠻夷邸雍錄陳湯斬郅支單于上疏乞垂之藁街蠻夷
邸間諸家無言藁街之在何地者唐都高驛即蠻夷邸
在朱雀街西與鴻臚府近

細柳倉通志在咸陽西三十里周亞夫屯軍處三輔故
事漢文帝大將軍周亞夫軍於細柳今呼石徼是也石

徽西有細柳倉東有嘉禾倉樊噲傳柳中即細柳地也
在長安西漢書注服虔曰在長安西北如淳曰長安細
柳倉在渭北近石徽注張揖曰在昆明池南今有柳市
是也師古曰匈奴傳云置三將軍軍長安西細柳渭北
棘門灞上此則細柳不在渭北揖說是也

蕭何第漢書蕭何傳蕭何買田宅必居窮僻處為家不
治垣屋曰令後世賢師吾儉不賢毋為勢家所奪長安
志王莽為安漢公以故蕭何宅為安漢公第

石奮宅漢書石奮傳高祖召其姊為美人徙其家長安中戚里注師古曰於上有姻戚者皆居之故名其里曰戚里

田子春宅通志在漢長安城中孟嘗君孫因諸呂擅權乃入關圖扶漢誅諸呂故有是宅

霍光第漢書霍光傳宣帝賜甲第一區

王根第通志曲陽侯王根大治第室極其奢僭司隸校尉京兆尹不敢舉奏

王商第漢書外戚傳成都侯王商穿長安城引內澧水
注第中大陂以行船上幸商第見穿城引水意恨內銜
之

董賢第漢書董賢傳哀帝詔將作大匠為賢起大第北
闕下重殿洞門土木之工窮極伎巧柱檻衣以錦綈
黃山苑漢書霍光傳霍雲當朝請數稱病私出多從賓
客張圍獵黃山苑中

袁廣漢園西京雜記茂陵富人袁廣漢藏鏹巨萬家僮

九百人於北芒巖築園

謹按北芒巖在興平即始平原也

東西四里南

北三里激流注其內構石為山高十餘丈連延數里養白鸚鵡紫鴛鴦旄牛青兕後沒入官為園鳥獸草木皆徙入上林苑

魏顏斐菜園魏志斐字文林為京兆守於府下起菜園使吏簡拔鋤治也

晉逍遙園長安志姚興嘗於逍遙園引諸沙門聽番僧鳩摩羅什講演佛經起逍遙宮殿庭旁有樓閣高百尺

相去四十丈以麻繩大一圍兩頭各絃樓上會日令二人各從繩上行過以為佛神相遇又澄元堂長安志在

逍遙園中

周華林園

周庚信三月三日華林園馬射賦并序堯以仲春之月刻玉而遊河舜以甲子之朝披圖

而巡洛夏后瑤臺之上或御二龍周王元圃之前猶駘八駿我大周之創業也南正司天北正司地平九黎之亂定三危之罪雲紀御官鳥司從職皇王有秉歷之符元圭有成功之瑞豈直天地合德日月光華而已哉皇帝以上聖之姿膺下武之運通乾象之靈啟神明之德夷與秩宗見之三禮變為樂正聞之九成克已脩於禮容威風總於戎政加以卑躬菲食皂帳緋衣百姓為心四海為念西郊不雨即動皇情東作未登彌迴天眷兵

華無會非有待於丹鳥宮觀不移故無勞於白燕銀甕
金船山車澤馬豈止竹葦西草共垂甘露青赤二氣同
為景星雕題鑿齒識海水而來王鳥弋黃支驗東風而
受吏於時元鳥司厯蒼龍御行羔獻冰開桐花萍合皇
帝幸於華林之園玉衡正而泰階平閭闔開而鈞陳轉
千軍雷動萬騎雲屯落花與芝蓋同飛楊柳共春旗一
色乃命羣臣陳大射之禮雖行袞襖之飲即同春蒐之
儀止立行宮裁舒帳殿階無玉瑩既異河間之碑戶不
金鋪殊非許昌之賦洞庭既張承雲乃奏騶虞九節狸
首七章正飾五采之雲壺寧百福之酒唐弓九合冬幹
春膠夏箭三成青瑩亦羽於是選朱汗之馬校黃金之
埽紅陽飛鵲紫燕晨風唐成公之驢驢海西侯之千里
莫不飲羽銜竿吟猿落鴈鐘鼓震地埃塵漲天酒以疊
行餉由鼎進彩則錦市俱移錢則銅山合徙太史聽鼓
而論功司馬張旃而賞獲上則雲布雨施下則山藏海
納寶天下之至樂景福之歡欣者也既而若木將低金

欽定四庫全書

卷六

波欲上天顏惟穆賓歌惟醉雖復暫離北闕聊宴西城
即同鄴水之朝更是岐山之會小臣不舉奉詔為文以
管窺天以蠡酌海盛德形容豈陳梗概歲次昭陽月在
大梁其日上已其時少陽春史司職青祇效祥徵萬騎
於平樂開千門於建章屬車醺酒複道焚香皇帝翊四
圉於帝閑迴六龍於天苑對宣曲之平林望甘泉之長
坂華蓋平龍風鳥細轉路直城遙林長騎遠帷宮宿設
帳殿開筵傍臨細柳斜界祈年開鶴列之陣靡魚鬚之
旂行漏抱刻前旌載為河湄薤草渭口澆泉棚雲五色
的暈重圓陽管既調春絃實撫總章協律成均樹羽翔
鳳為林靈芝為圃草銜長帶桐垂細乳鳥轉歌來花濃
雪聚玉律調鐘金鏤節鼓於是咀銜拉鐵逐日追風并
試長楸之埒俱下蘭池之宮鳴鞭則汗顏入埒則塵紅
既觀賢於大射乃頒政於司弓變三驅而畫鹿登百尺
而懸熊繁弱振地鐵驪踏空禮正六耦詩歌九節七札
俱穿五靶同穴弓如明月對棚馬似浮雲向埒雁失羣

而行斷猿求林而路絕控玉勒而搖星跨金鞍而動月
乃有六郡良家五陵豪選新迴馬邑之兵始罷龍城之
戰將軍戎服來參武讌尚帶流星猶乘奔電始聽鼓而
唱籌即倚竿而標箭馬噴沾衣塵驚灑面石堰水而澆
園花乘風而繞殿熊耳刻杯飛雲畫壺水衡之錢山積
織室之錦霞開司筵賞至酒正杯來至樂則賢乎秋水
歡笑則勝上春臺既而日下澤宮筵闌相圖悵從蹕之
留歡眷迴鑒之餘舞欲使石梁銜箭銅山飲羽橫弧於
楚水之蛟飛鏃於吳亭之虎况復恭己無爲南風在斯
非有心於蜺翼豈留情於戟枝惟觀揖讓之禮盖取威
儀雄之

臣謹按周明帝紀武成二年三月會羣公列將卿大夫
及突厥使者於芳林園賜錢帛各有差則園在長

安明矣庾信賦稱歲次昭陽係辛巳年乃武帝保定
元年蓋帝初即位踵行故事而史偶失書耳攷魏志
云芳林園避少帝號改曰華林是則鄴下先有芳林
園後周無諱當避而此賦亦改芳為華則未詳何故
耳

隋大興苑長安志開皇元年置通志在宮城之北即唐
禁苑也

芙蓉園劉餗小說本古曲江文帝惡其名曲改名芙蓉

園為其水盛而芙蓉富也雍錄隋營京城宇文愷以京
城東南隅地高故闕此地不為居人坊巷鑿之為池以
厭勝之又會黃渠水自城外南來可以穿城而入入城
為芙蓉池且為芙蓉園也

謹按芙蓉園劉餗以為在城外程大昌以為在城中據康

駢劇談錄云芙蓉園在曲江之南則在城外明矣

煬帝藩邸長安志武德中以賜左僕射蕭瑀所為少陵
原南接終南北至滻水即漢鴻固原也後瑀子銳尚襄
城公主詔別營主第主辭以姑婦異居有乖禮則因固

陳請乃取園地充主第又辭公主榮戟不欲異門乃并施瑀之院門

西苑雍勝畧隋煬帝大業元年築西苑周三百里其內為海周十餘里為方丈蓬萊瀛洲諸山高出水百餘尺臺觀宮殿羅絡山上向背如神海北有龍鱗渠縈紆注海內緣渠十六院門皆臨渠每院以四品夫人主之堂殿樓觀窮極華麗宮樹秋冬凋落則剪綵為華葉綴於枝條色渝則易以新者常如陽春沼內亦剪綵為芰荷

菱芡乘興遊幸則去冰而布之十六院競以餽羞精麗
相尚求市恩寵上好以宮女月夜數千騎遊西苑作清
夜遊曲於馬上奏之又西苑池雍大記在長安城中

楊素宅通志在延康坊

唐禁苑長安志在宮城之北東西二十七里南北三十
三里東接灊水西臨長安故城南連京城北枕渭水苑
西即太倉北距中渭橋與長安故城相接東西十三里
南北十三里亦隸苑中苑中四面皆有監南面太樂監

北面舊宅監東監西監分掌宮中植種及修葺園囿等事又置苑總監領之皆隸司農寺苑中宮亭凡二十四所南面三門中曰景曜東曰芳林西曰光化東面二門南曰光泰北曰昭遠西面二門南曰延秋北曰元武北面三門中曰啟運東曰飲馬西曰永泰雍錄曰唐大內有三苑西內苑東內苑禁苑皆在兩宮北而有分別西內苑並西內太極宮之北東內苑則包大明宮東北兩面兩內苑北門之外始為禁苑之南門 內苑長安志

啟運門之南有內苑北曰重元門東曰東雲龍門西曰西雲龍門自元武門北至重元門一里東西與宮門齊南望春亭北望春亭雍錄在禁苑東南高原之上舊記多云望春宮其東正臨漣水也天寶元年韋堅因古跡堰渭水絕漣灞為潭東注永豐倉下以便漕運名廣運潭未幾漣灞二水沙泥衝塞潭不可漕付司農掌之

為捕魚之所

王維奉和聖製於望春亭觀禊飲應制詩長樂青門外宜春小苑東樓開萬井上輦

過百花中畫鷁移仙仗金貂列上公清歌邀落日妙舞向春風渭水明秦甸黃山入漢宮君王來後禊灞漣亦

朝宗

魚藻池雍正大記深一丈在禁苑中貞元十三年詔

更淘四尺引灞河水漲之在魚藻宮後穆宗以觀競渡
雍錄王建宮詞曰魚藻宮中鎖翠娥先皇行處不曾過
而今池底休鋪錦菱角鷄頭積漸多先皇謂德宗池底
張錦引水被之令其光艷透見也蠶壇亭長安志在

院之東皇后祈先蠶之所青門亭長安志去宮城十
三里在長安故城之東即邵平種瓜之所櫻桃園通
志在禁苑之南又有東西葡萄園臨渭亭長安志禁

苑內舊唐書中宗本紀景龍四年四月甲寅幸臨渭亭
修禊飲 桃園亭長安志去宮城四里隸舊宅監所領
咸宜宮未央宮長安志禁苑內皆漢之舊宮也去宮
城二十一里唐置都邑之後因其舊址復增修之宮側
有未央池漢武庫武宗會昌元年因遊畋至未央宮見
其遺趾詔葺之尚有殿舍二百四十九間作正殿曰通
光殿東曰詔芳亭西曰凝思亭又有南昌國北昌國流
杯三亭皆漢舊趾並立端門隸舊宅監所 梨園雍錄

在光化門北光化門禁苑南面西頭第一門在芳林景
曜門之西也中宗令學士自芳林門入集於梨園分朋
拔河則梨園在太極宮西禁苑之內矣開元二年置教
坊於蓬萊宮上自教法曲謂之梨園弟子至天寶中即
東宮宜春北苑命宮女數百人為梨園弟子是梨園者
按樂之地預教者名為弟子唐崔湜梨園亭子侍宴應
制詩年光陌上發香輦禁
中游草綠鴛鴦殿花明翡翠樓寶杯呈露
酌仙館雜風流今日陪歡豫皇恩不可酬坡頭亭柳
園亭月坡毬場亭子青城橋新鱗橋栖雲橋凝碧橋上

陽橋正興亭元沼亭神皋亭七架亭明水園長安志並
內苑所有 東內苑長安志南北二里與大明宮城齊
東西盡一坊之地南即延政門北即銀臺門東即太和
門 龍首池長安志在東內苑會要元和十三年浚龍
首池 靈符應聖院長安志在龍首池東 凝碧池雍
大記在東內苑雍錄祿山亂逆徒張樂於此樂工雷海
青憤擲樂器王維陷賊被拘僧寺聞之為詩曰萬戶傷
心生野烟百官何日再朝天秋槐葉落深宮裏凝碧池

頭奏管絃

已上禁苑

尚書省雍錄在朱雀門北正街之東自占一坊長安志
省中有都堂本尚書令廳事都堂之東吏部戶部禮部
三行每行四司左司統之都堂之西兵部刑部工部每
行四司右司統之

吏部選院雍錄長安志曰在尚書省之南亦曰吏部南
院選人看榜之所也六典吏部員外郎掌選院謂之南
曹注云其曹在選曹之南也

禮部南院長安志吏部選院東禮部南院四方貢舉聚會之所也雍錄禮部南院者即貢院也今世淡墨書進士榜首列四字曰禮部貢院者唐世遺則也則唐人已嘗名南院為貢院矣有列榜之地如吏部

國子監長安志在務本坊監東開街若兩坊北抵皇城南盡一坊之地監中有孔子廟貞觀四年立又房元齡宅亦在此坊

驥德院雍錄後院有驥德院禁馬所在亦在務本坊

禮賓院冊府元龜元和九年六月置禮賓院於長興里北

京兆府廨長安志在光德坊東南隅府內廨宇並隋開皇中制度其後隨事改作

萬年縣廨長安志宜陽坊東南隅萬年縣廨去府七里縣門屋宇文愷所造太平公主降薛紹於縣廨設昏席初以縣門隘狹欲毀之高宗敕宇文愷所造製作多奇不須毀拆也

長安縣廨長安志長壽坊西南隅長安縣廨去府六里
尉遲恭宅亦在是坊

曲江池雍勝畧去咸寧縣南一十里本秦隄州漢之宜
春下苑也太平寰宇記曲江池其水曲折有似廣陵之
江故名之西京記朱雀街東第五街皇城之東第三街
昇道坊龍華尼寺南有流水屈曲謂之曲江劇談錄曲
江開元中疏鑿遂為勝境其南有紫雲樓芙蓉園其西
有杏園慈恩寺花卉環周烟水明媚都人遊玩盛於中

和上巳之節綠幄翠幃匝於堤岸鮮車健馬比肩擊轂
上巳賜宴臣僚京兆府大陳筵席長安萬年二縣以雄
勝相較錦繡珍玩無所不施百辟會於山亭恩賜太常
及教坊聲樂池中備綠舟數隻惟宰相三使北省官與
翰林學士登焉傾動皇州以為勝觀入夏則菰蒲蔥翠
柳陰四合碧波紅藥湛然可愛好事者賞芳辰翫清景
聯騎攜觴疊疊不絕春明退朝錄曲江宴唐初設以慰
下第舉人其後弛廢而進士會同年於此開元時造紫

雲樓於江邊至期上率宮嬪垂簾觀焉命公卿士庶大
酺各攜妾妓以往娼優縑黃無不畢集先期設幕江邊
是以商賈皆以奇貨麗物陳列豪客園戶爭以名花布
道進士乘馬盛服鮮制子弟僕從隨後率務華侈都雅
推同年俊少者為探花使有匿花於家者罰之開元天
寶間旁有殿宇安史亂後盡圯廢文宗覽杜甫詩云江
頭宮殿鎖千門細柳新蒲為誰綠因建紫雲樓落霞亭
歲時賜宴又詔百司於兩岸建亭館名山記曲江亭在

府城東曲江池西南

唐羅鄴曲江春望詩故國東歸澤國遥曲江晴望憶漁蓑綵北闕

春先到不是南山雪易消瑞影玉樓閒組繡散聲丹禁
奏雲韶雖然未得陪鴛鴦亦醉金觴祝帝堯盧綸曲江
春望詩萼蒲翻葉柳交枝暗上蓮舟鳥不知更望荷花
最深處玉樓金殿影參差雍裕之曲江池上詩殷勤春
在曲江頭全藉羣仙占勝遊何必
三山待鸞鶴年年此地是瀛洲

杏園玉海曲江池西會要大中元年正月敕進士放榜

後杏園宴集

韋曲雍勝畧在咸寧縣南二十里樊川唐韋安石別業

杜石花亭號為勝地杜甫詩云韋曲花無賴家家惱殺

人

杜曲雍錄在啟夏門外向西少陵原也杜甫詩云杜曲
花光濃似酒雍勝畧杜曲去咸寧縣南三十里樊川韋
曲東十里有南杜北杜杜固謂之南杜杜曲謂之北杜
按二曲名勝之地韋杜二家歷代顯宦故唐人語曰城
南韋杜去天尺五

九曲池雍大記在長安城西興慶池西唐寧王山池院
引興慶水西流䟽鑿屈曲連環為九曲池上築土為基

疊石為山植松栢有落猿岩棲鳳岫奇石異木珍禽怪獸又有鶴洲仙渚殿宇相連左滄浪右臨漪王與宮人賓客宴飲弋釣其中

定昆池雍大記本安樂公主西莊也在京城延平門外景龍初命司農卿趙履溫為公主疏園植果中列臺榭憑空架迴棟宇相屬又敕將作監少監楊務廉引水作沼延十數里時號定昆池通典曰安樂公主恃寵請昆明池中宗不與公主怒自以家財別穿池號曰定昆景

龍中中宗幸焉

度支亭子長安志在永達坊輦下歲時記新進士牡丹宴在永達亭子

家令寺園長安志在昌明坊貞觀中日南王入朝詔於此營第尋還國宅遂廢復為園

諸王府長安志寶歷二年以延康坊官宅一區為諸王府唐朝故事王府在京師合有曹局自天寶以後王不出閣所置寮采過於閒冗至是瓊王府長史裴簡求奏

遽創官府

十六宅雍錄在安國寺東附苑城為大宅分處十王謂
慶忠棟鄂榮儀臺頴永濟也後盛壽陳豐常涼六王又
就封入內宅是為十六宅後以諸孫成長又置百孫院
永寧園長安志在永寧坊賜祿山永寧園為邸

奉誠園長安志馬燧宅在安邑里貞元末獻舊第為奉

誠園

唐元稹奉誠園詩蕭相深誠奉至尊舊居求作
奉誠園秋來古巷無人掃樹滿空牆閉戟門

馬璘池亭長安志在崇賢坊後入官貞元後羣臣多賜

宴於此

何將軍山林通志今謂之塔坡少陵原乃樊川之北原
自司馬村起至此而盡其高三百尺在杜城之東韋曲

之西山林久廢上有寺浮圖亦廢

唐杜甫陪鄭廣文遊何將軍山林詩不識

南塘路今知第五橋名園倚綠水野竹上青霄谷口舊
相得濠梁同見招平生爲幽興未惜馬蹄遥百頃風潭
上千章夏木清平枝低結子接葉暗巢鶯鮮鱗銀絲膾
香芹碧澗羹翻疑舵樓底晚飯越中行萬里戎王子何
年別月支異花開絕域蔓草匝清池漢使徒空到神農
竟不知露翻兼雨打開拆漸離披旁舍連高竹疎籬帶
晚花碾渴深沒馬藤蔓曲藏蛇詞賦工無益山林跡未
餘盡拈書籍賣來問爾東家賸水滄山破殘山碣石開

欽定匹庫全書

卷六

綠垂風折筍紅綻雨肥梅銀甲彈箏用金魚換酒來興
移無灑掃隨意坐莓苔風磴吹陰雪雲門吼瀑泉酒醒
思卧簾衣冷欲裝綿野老來看客河魚不取錢只疑淳
朴處自有一山川棘樹寒雲色茵陳春藕香脆添生菜
羹陰益食單涼野鶴清晨出山精白日藏石林端水府
百里獨蒼蒼憶過楊柳渚走馬定昆池醉把青荷葉狂
遺白接羅刺船思郢客解水乞吳兒生對秦山晚江湖
興頗隨牀上書連屋階前樹拂雲將軍不好武推子總
能文醒酒微風入聽詩靜夜分綿衣挂蘿薜涼月白紛
紛幽意忽不愜歸期無奈何出門流水住回首白雲多
自笑燈前舞誰憐醉後歌祇應與朋好風雨亦來過又
重過何氏詩問訊東橋竹將軍有報書倒衣還命駕高
枕乃吾廬花妥鶯捎蝶溪宣獺趁魚重來休沐地真作
野人居山雨尊仍在沙泥榻未移犬迎曾宿客鵝護落
巢兒雲薄翠微寺天清皇子陂向來幽興極步履過東
籬落日平臺上春風吸茗時石闌斜點筆桐葉坐題詩

翡翠鳴衣桁蜻蛉立釣絲自今幽興熱來往亦無期頗
怪朝參懶應耽野趣長雨拋金鎖甲苔卧綠沈檣手自
移蒲柳家纔足稻梁看君用幽意白日到羲皇到此應
常宿相留可判年蹉跎暮容色悵望好林泉何日沾微
祿歸山買薄田斯懷
恐不遂把酒意莊然

逍遙公別業張說東山記韋嗣立東山之側有別業焉

上聞而賞之乃命千官飲乎池上即席拜逍遙公名其

居曰清虛原幽栖谷唐紀韋嗣立構別廬於驪山鳳凰

原鸚鵡谷有重崖洞壑飛瀑中宗臨幸改為清虛原幽

栖谷拜嗣立為逍遙公

唐李嶠奉和聖製辛韋嗣立山莊應制詩萬騎千官擁帝車八

龍三馬訪仙家鳳凰原上
開青壁鸚鵡杯中美紫霞

王維別墅雍錄輞川在藍田縣西南二十里王維別墅
在焉本宋之問別圃也王維輞川詩序余別業在輞川

山谷其遊止有孟城坳華子岡文杏館斤竹嶺鹿柴木

蘭柴茱萸洪宮槐陌臨湖亭南垞欽湖柳浪藥家潁金

屑泉白石灘北垞竹里館辛夷塢漆園椒園等與裴迪

閒暇各賦絕句云

唐王維輞川閒居詩一從歸白社不復到青門時依簷前樹遠看原上村

青菰臨水拔白鳥向山翻寂寞於陵子桔槔方灌園又
孟城坳詩新家孟城口古木餘衰柳來者復爲誰空悲

昔人有華子岡詩飛鳥去不窮連山復秋色上下華子
岡惆悵情何極文杏館詩文杏裁為梁香茅結為宇不
知棟裏雲去作人間雨斤竹嶺詩檀欒映空曲青翠漾
連漪暗入商山路燕人不可知鹿柴詩空山不見人但
聞人語響返景入深林復照青苔上木蘭柴詩秋山斂
餘照飛雨逐前侶彩翠時分明夕嵐無處所茱萸杯宮
結實紅且綠復如花更聞山中儻留客置此茱萸杯宮
槐陌詩仄徑蔭宮槐幽蔭多綠苔磨門但迎掃畏有山
僧來臨湖亭詩輕舸迎上客悠悠湖上來當軒對尊酒
四面芙蓉開南垞詩輕舟南垞去北垞森難即隔浦望
人家遙遙不相識歌湖詩吹簫臨極浦日暮送夫君湖
上一回首青山卷白雲柳浪詩分行接綺樹倒影入清
漪不學御溝上春風傷別離樂家瀨詩颯颯秋雨巾淺
淺石溜瀉跳波自相濺白鷺鷺復下金屑泉詩日飲金
屑泉少當千餘歲翠鳳翊文螭羽節朝玉帝白石灘詩
清淺白石灘綠蒲向堪把家住水東西浣紗明月下北

欽定四庫全書

卷六

坨詩北坨湖水北雜樹映朱闌迤迤南川水明滅青林
端竹里館詩獨坐幽篁裏彈琴復長嘯深林人不知明
月來相照辛夷塢詩木末芙蓉花山中發紅萼澗戶寂
無人紛紛開且落漆園詩古人非傲吏自闕經世務偶
寄一徵官婆婆數株樹椒園詩桂尊迎帝子杜若贈佳
人椒漿奠瑤席欲下雲中君裴迪孟城坳詩結廬古城
下時登古城上古城非疇昔今人自來往華子岡詩落
日松風起還家草露晞雲光侵履跡山翠拂人衣文杏
館詩迢迢文杏館躋攀日已屢南嶺與北湖相看復迴
顧斤竹嶺詩明流紆且直綠篠密復深一徑通山路行
歌望舊岑鹿柴詩日夕見寒山便為獨往客不知深林
事但有麕麕跡木蘭柴詩蒼蒼落日時鳥聲亂溪水緣
谿路轉深幽興何時已采萸泥詩飄香亂椒桂布葉間
檀欒雲日雖迴照森沈猶自寒宮槐陌詩門前宮槐陌
是向歌湖道秋來山雨多落葉無人掃臨湖亭詩當軒
彌泥漾孤月正裴回谷口猿聲發風傳入戶來南坨詩

孤舟信一泊南垞湖水廣青熒天色同艤舟一長嘯四面來清
湖詩空濶湖水廣青熒天色同艤舟一長嘯四面來清
風柳浪詩映池同一色逐吹散如絲結陰旣得地何謝
陶家詩樂家瀨詩瀨聲喧極浦沿涉向南津汎汎鷗鳬
渡時時欲近人金屑泉詩紫淨澹不流金碧如何拾迎
晨含素華獨往事朝汲白石灘詩歧石復臨水弄波情
未極日下川上寒浮雲澹無色北垞詩南山北垞下結
宇臨歌湖每欲采樵去扁舟出菰蒲竹里館詩來過竹
里館日與道相親出入惟山鳥幽深無世人辛夷塢詩
綠堤春草合王孫自留翫況有辛夷花色與芙蓉亂
園詩好聞早成性果此諧宿諾今日漆園遊還同莊叟
樂椒園詩丹刺胃人衣芳香留過客幸堪調鼎用願君
垂采摘

大興湯院通志藍田西南有地雪落即融唐時有異僧

見之曰必溫泉也掘之果然凡病者浴之輒愈後有白魚之瑞神女屢降立玉女堂於泉側明皇賜名大興湯院

李靖宅通志在三原縣韋端符觀李衛公故物記端符於三原令坐中揖其羣官有客曰李彥芳是衛公之胄也其家傳賜書與他服器十餘物俱無恙

張說宅通志在永興坊本侍中王德正宅燕公修葺之又說有別宅在宣義坊

裴度宅通志在永樂坊

魏徵宅雍錄在永興坊

長寧公主宅兩京記在崇仁坊西南隅後為禮會院長
安志公主及駙馬楊春交奏割宅向西一半官市為禮
會院每公主郡縣主出降皆就此院成禮又蘓瓌宅亦
在是坊

李林甫宅長安志在平康坊本尚書令左僕射衛國公
李靖宅景龍中韋庶人妹夫陸頌所居韋氏敗靖姪孫

令聞居之後為林甫宅有堂如偃月每欲排擠大臣即處之思所以中傷者又蘭陵公主褚遂良裴光庭宅俱在乎康坊

號國夫人宅通志在宣陽坊明皇雜錄本韋嗣立舊宅太真外傳楊鈺與國忠五家於宣陽里甲第洞開僭擬宮掖每造一堂費逾千萬見制度宏於已者則毀之復造土木之工不舍晝夜又長安志郭元振楊國忠宅俱在宣陽坊

郭子儀宅譚賓錄在親仁坊宅居其坊地四分之一通永巷家人三千出入者不知其居其里巷負販之人上至簪纓之士出入不問或至王夫人趙氏愛女方妝梳對鏡公麾下將吏及郎吏皆被召令汲水持悅視之不異僕隸他日子弟集諫公笑曰爾曹固非所料吾官馬食粟者五百匹官餽者一千人進無所往退無所據向使重垣扃戶不通內外一怨將起搆以不臣則噬臍莫及矣今蕩蕩無間四門洞開雖讒毀無以加也諸子皆

服又子儀園長安志在大安坊後為岐陽公主別館

安祿山宅長安志在親仁坊滕王元嬰宅亦在是坊

楊憑宅唐書楊憑傳憑入拜京兆尹治第永寧里工役
叢煩謗議頗謹貶臨賀尉窮幽記白樂天得楊憑宅竹
木池館有林泉之致因為池上篇又長安志裴行儉裴
炎李輔國徐浩王涯白敏中宅俱在永寧坊

李晟宅長安志興元二年賜永寧里甲第

渾瑊宅長安志興元元年賜渾瑊宅在進昌坊

宋璟宅長安志在大寧坊

柳公綽宅通志在昇平坊

柳公權宅通志在耀州北四十里宅廢今名為柳家原宅旁有公權瘞筆塚

姚崇宅通志在興寧坊又李憇宅亦在是坊

李光顏宅長安志開化坊有李光顏宅穆宗初賜第崇德坊以為別宅

令狐楚宅酉陽雜俎在開化坊

牛僧孺宅通志在新昌坊

殷開山顏師古宅通志並在敦化坊長安志貞觀永徽
間太常少卿歐陽詢著作郎沈越賓亦在此坊殷顏南
朝舊族歐陽與沈又江左士人時人呼此坊為吳兒坊
元載宅長安志在安仁坊譚賓錄元載城中南北二甲
第又於近郊起亭榭帷帳什器皆如宿設城南別墅凡
數十所奴僕曳羅綺二百餘人又杜佑宅長安志在安
仁坊

李思訓宅長安志在通義坊

間立本宅長安志在延康坊

武元衡宅通志在靖安坊又韓愈劉伯芻李宗閔宅亦在是坊

張九齡宅通志在修政坊

李光弼宅通志在敦義坊

武三思宅通志在休祥坊

李勣宅通志在普寧坊

上官昭容宅通志在羣賢坊

宋寇準宅通志新說曰府城掖庭街有寇萊公宅中有山池熙熙臺後改為安衆禪院中有萊公祠堂又渭南縣亦有萊公宅今城內普照寺即其遺址

孫思邈宅長安志今為僧寺在役祠縣東五里流惠鄉惠政坊啟玉山

种放宅通志新說曰府城街後有种太尉宅中有奎鉤閣賜之閣閣下東壁繪晉王羲之蘭亭圖西壁繪廬山

遠公白蓮社圖

空翠堂通志在鄆縣西五里漢陂北岸隄上取杜甫漢陂行絲管啁啾空翠來之句宋知縣張俊撰記久而堂廢明嘉靖間重建前有紫閣後有菱池氣象清幽松竹叢中水磨之聲不絕

司竹監長安志在盤屋縣東三十里史記渭川千畝竹漢謂秦地有鄆杜竹林晉地道記司竹都尉治鄆縣其園周一百里以供國用唐置司竹監丞掌之隋義寧元

年唐高祖起兵其第三女平陽公主舉兵於司竹園號
娘子軍宋設監仍唐制通志明設司竹局以大使典之

宋蕪軾司竹監燒葦園因召都巡檢柴貽勗左藏以其
徒會獵園下詩官園川葦歲留槎深冬放火如紅霞枯
槎熱盡有根在春雨一洗皆萌芽黃狐老兔最狡捷賣
侮百獸常矜誇年年此厄竟不悟但受蒙密爭來家風
迴焰卷毛尾燒欲出已被蒼鷹遮野人來言此最樂徒
手晚出歸浦中巡邊將軍在近邑呼來颯颯從矛又戍
兵久閒可小試戰鼓雖凍猶堪搗雄心欲搏南澗虎陣
勢頗學常山蛇霜乾火烈聲爆野飛走無路號且呀迎
人截來君逢箭避犬逸去窮投置擊鮮走馬殊未厭但
恐落日催棲鷗樊旗仆鼓坐數獲鞍挂雉兔肩分麋主
人置酒聚狂客紛紛醉語晚更譁燎毛燔肉不暇割飲
啖直欲追羲媧青邱雲夢古所宅與此何啻百倍加苦

遭諫疏說夷并又被賦客嘲淫奢豈如聞官走山邑放
曠不與趨朝衙農工已畢歲云暮車騎雖少賓殊佳酒
酣上馬去不告獵

獵霜風吹帽斜

姚氏山亭通志在盤屋黑水峪

宋蘇軾自仙遊回至黑水見居民姚氏山亭高

絕可愛復憇其上詩山鵲曉辭谷似報遊人起出門猶
屢顧慘若去吾里道途險且紆繼此復能幾溪邊有危
構歸駕聊復枕愛此山中人縹緲如仙子平生暮獨往
官爵同一屣胡為此溪邊春若有侯國恩久未報念
此楚且此臨風浩悲吟萬世同
一軌何年謝簪紱丹砂留迅晷

御花園通志在渭南縣花園村舊志謂宋太后所置周

處廟碑云曹皇后莊

望輝堂通志在耀州署後州東鑑山年豐則有光如鑑
故登此堂以望之宋皇祐中華原令楊庭建

金張中孚宅通志府城草場街有金紫光祿大夫張中
孚宅中有頤真堂衆樂堂流杯亭後為錢監元為利用
倉

元成德堂通志長安府學成德堂七門八椽高敞雄壯
元末已毀明宣德中建為明倫堂


廉相泉園通志元至元中平章廉希憲行省陝右愛秦

中山水遂於樊川杜曲林泉佳處葺治廳館亭榭導泉
灌園移植漢沔東洛奇花異卉畦分碁布松檜梅竹羅
列成行暇日雅歌投壺彈琴詠詩其間

柳塘通志在鄠縣南山下元楊奐隱居教授其徒植柳
千株有清風閣讀書堂

明秦王府雍大記在西安府城中之左洪武初命長興
侯耿炳文修洪武三年四月初七日封愍王之國於秦
又保安郡王府在秦府之西永興郡王府在秦府西南

一里興平郡王府永壽郡王府並在秦府西南二里宜川郡王府在秦府西南三里小池坊汧陽郡王府在秦府西北半里郿陽郡王府在秦府東南三里臨潼郡王府在東城之外洪武中為蒲城郡主府第



關中勝蹟圖卷六